

Headlines

- बरोधी धड़ें आसेआ बक्ख-बक्ख मामलें गी लेइयै हंगामा कीते जाने दे चलदे अज्ज संसद दे दौनें सदनें दी कार्रवाई दिन भरै लेई स्थगित करनी पेई गई।
- सरकारै अज्ज नमीं दिल्ली च 'बाल विवाह मुक्त' भारत नांऽ दे राश्ट्रीय अभियान गी शुरू करोआया।
- केंद्री मंत्री डॉ. जतिंद्र सिंह होरें आखेआ ऐ जे मुख्य च जारी अभियान दे तैहत बनाए गेदे डिजिटल जीवन प्रमाण पत्तरें दी गिनतरी 1 करोड़ दे आंकड़े गी पार करी गई ऐ।
- मौसम विभाग नै औंदी 30 नवंबर शा त्र'ऊं दिनें तोहड़ी प्रदेश च बरखा ते बर्फबारी दी पेशगोई कीती ऐ।

<><><><><><>

Parliament Adjourned

संसद च इक प्रमुख कारोबारी समूह दे खलाफ गुज्जखोरी दे आरोपें सने बक्ख-बक्ख मुद्दें पर विपक्ष दे हंगामे दे चलदे अज्ज दौनें सदनें दी कार्यवाही दिन भरै लेई स्थगित करी दित्ती गई। राज्यसभा च पैहले स्थगन दे बाद सदन दी कार्यवाही साठे 11 बजे शुरू होई, तां कांग्रेस, वामपंथी दलें, डीएमके, तृणमूल कांग्रेस, समाजवादी पार्टी ते आम आदमी पार्टी सने विपक्षी सदस्ये दा हंगामा जारी रेया। इस कारण सदन दी कार्यवाही दिन भरै लेई स्थगित करी दित्ती गई। एहदे शा पैहले अज्ज बड्डुलै सदन दी कार्यवाही शुरू होई, तां सभापति जगदीप धनखड़ होरें विपक्ष दी तरफा नियम 267 दे तैहत स्थगन नोटिस खारिज करी दित्ते। एह नोटिस प्रमुख कारोबारी समूह दे खलाफ गुज्जखोरी दे आरोपें, मणिपुर हिंसा ते उत्तरप्रदेश दे सम्भवल च हिंसा दे मामलें पर दित्ते गेदे हे। श्री धनखड़ होरें सदस्ये गी गुजारिश कीती जे ओहू चर्चा लेई साज़गार म्हाल बनाई रक्खन ते सदन दी कार्यवाही च सैह्योग करना। बरोधी सदस्ये हंगामा जारी रक्खेआ ते सदन गी साठे 11 बजे तगर लेई स्थगित करी दित्ता गेआ। उधर, लोकसभा च पैहले स्थगन दे बाद जेल्लै दपैही 12 बजे सदन दी कार्यवाही शुरू होई तां कांग्रेस, समाजवादी पार्टी, डीएमके ते होरनें बरोधी दलें दे सदस्य इक प्रमुख कारोबारी समूह पर कथित गुज्जखोरी दे आरोपें ते होरनें मुद्दें गी लेइयै नारेबाजी करदे होई सदन दे बिच्चो-बिच्च आई गे। हंगामा जारी रौहने करी सदन गी दिनभरै लेई स्थगित करना पेई गेआ।

<><><><><><>

Bal Vivah Mukht Bharat

सरकारै अज्ज नमीं दिल्ली च बाल विवाह मुक्त भारत नांऽ दे राश्ट्री अभियान दी शुरुआत कीती। इस अभियान दा मुख मकसद देशै गी बाल विवाह मुक्त राष्ट्र बनाना ऐ। महिला ते बाल विकास मंत्री अन्नपूर्णा देवी होरें अभियान दी शुरुआत करदे होई आखेआ जे सरकारै 130एं जिलें दी पन्छान कीती ऐ जित्थे इस अभियान गी मुख तौर पर चलाया जाहगा। उनें आखेआ जे बाल विवाह नां छड़ा इक अपराध ऐ सगुआं मनुखी अधिकारें दी उल्लंघना बी ऐ। केंद्री मंत्री होरें आखेआ जे बाल विवाह मुक्त भारत अभियान छड़ा 10 जां 15 दिनें दा आयोजन नेई ऐ, सगुआं एहू इक लगातार चलने आहला जतन ऐ। कार्यक्रम दरान अन्नपूर्णा देवी होरें बाल विवाह मुक्त भारत पोर्टल गी बी शुरू करोआया। इस ऑनलाइन प्लेटफॉर्म गी जागरूकता बधाने, बाल विवाह गी रोकने ते बाल विवाह दिएं घटनाएं गी दर्ज कराने दे अभियान लेई विकसित कीता गेआ ऐ।

<><><><><><>

Rana-JJGS

म्हान जनजातीय नेता भगवान बिरसा मुंडा हुंदी 150मीं जयंती दे सरबंधै च हफ्ता भर चले दा जन जातीय गौरव सप्ताह 2024 कल गुज्जर देश चैरीटेबल ट्रस्ट जम्मू च इक बड्डे कार्यक्रम दे आयोजन कन्नै संपन्न होई गेआ। कार्यक्रम दी प्रधानता जल शक्ति विभाग, जंगलात विभाग, पर्यावरण ते जनजातीय मामलें दे मंत्री जावेद अहमद राणा होरें कीती। अपने संबोधन च मंत्री होरें इस किस्मै दे महत्वपूर्ण आयोजन लेई जनजातीय मामलें सरबंधी मैहकमे दे जतनें दी सराहना कीती। उनें आखेआ जे जनजातीय आबादी दा समाजी-आर्थिक विकास जकीनी बनाना ते अपनी विरासत गी अगगे बधाना स्हाडी सब्बनें दी सांझी जिम्मेदारी ऐ। उनें आखेआ जे सरकार जनजातीय आबादी दे कल्याण लेई वचनबद्ध ऐ।

<><><><><><>

Trade Fair

दिल्ली दे भारत मंडपम च जारी 43में भारती अंतराष्ट्री बपार मेले-आईआईटीएफ दा अज्ज खीरी ध्याडा ऐ। मेले दा विशे सार ऐ - विकसित भारत 2047। 14एं दिनें दा एहू मेला आलमी सतह उप्पर भारत दी आर्थिक ते सांस्कृतिक समृद्धि गी प्रदर्शित करदा ऐ। मेले गी इस बारी शानदार प्रतिक्रिया थ्होई जेह्दे च बडी बद्ध गिनतरी च लोक पुज्जे। इस बारी मती तरजीह आह्ला राज्य झारखंड ऐ जदके बिहार ते उत्तर प्रदेश भागीदार राज्य रेया। अंतराष्ट्री मेले च चीन, मिख, ईरान, दक्खन कोरिया, थाईलैंड, तुर्कीय ते संयुक्त अरब अमीरात सने 11एं मुल्लें हिस्सा लैता।

<><><><><><>

Day IFFI

55में भारती अंतराष्ट्री फिल्म उत्सव च अज्ज मशहूर फिल्म निर्देशक तपन सिन्हा हुंदी फिल्म जात्तरा पर विशेष कार्यक्रम 'द स्पेयक्टर्म एंड द सोल' आयोजित कीता गेआ। अर्जुन चक्रवर्ती, एन.मनु. चक्रवर्ती ते मन्नी-परमन्नी दी अभिनेत्री शर्मिला टैगोर दी सदस्यता आहले इक प्रतिष्ठित समूह नै तपन सिन्हा हुंदी बेजोड़ निर्देशक कला पर अपनी गल्ल आखी। आकाशवाणी कन्नै गल्लबात च अर्जुन चक्रवती होरें दस्सेआ जे तपन सिन्हा होरें 48 फिल्में दा निर्देशन कीता पर कुसै बी फिल्म च विशे ते शैली गी दोहराया नेई। एह्दे शा पैहले मन्ने-परमन्ने दे फिल्म कार आशुतोष गोवारिकर हुंदी अध्यक्षता आहले अंतराष्ट्री प्रतियोगिता निर्णायक मंडल नै इस बारे प्रतियोगिता वर्ग च आई फिल्में दे बारै च अपने विचार सांझे कीते।

<><><><><><>

EPFO Samba (byte)

कर्मचारी भविष्य निधि संगठन - ईपीएफओ दे जम्मू आहले इलाकाई दफ्तरै अज्ज सांबा दे डिप्टी कमिशनर हुंदे दफ्तर परिसर च निधि आपके निकट अभियान दे दुए चरण तैहत जागरूकता कार्यक्रम दा सरिस्ता कीता। प्रोवीडेंट फंड कमिशनर रिज़वान-उद्दीन होरें निजी तौर पर इस पैहलकदमी दी अगुवाई कीती ते जिले दे वर्करें ते कर्मचारिणं दे मसलें गी सिद्धे तौर पर हल करोआया। इस बारै स्टाडे जिला संवाददाता कन्नै गल्ल करदे होई कमिशनर रिज़वान-उद्दीन होरें आखेआ

<><><><><><>

Kak-Journalist

जम्मू-कश्मीर दे वरिष्ठ पत्रकार डण्स् ज्ञां हुंदा घाल होई गेआ ऐ। उनें अपने अखीरी साहू अपने गुरूग्राम आहले घरै च लैते। ओहू दहाके तगर दा ट्रीब्यून कन्नै जुडे दे रेया। 1990 च घाटी थमां पलायन दे बाद ओहू जम्मू च रौहंदे हेए फही ओहू गुरूग्राम च बसी गे। उंदा अखीरी संस्कार गुरूग्राम च 29 नवंबर गी होग।

<><><><><><>

Jitendra-DLC 3.0

जन शकैत, कर्मियें ते पिंशन सरबंधी राज्यमंत्री डॉ. जतिंद्र सिंह होरें आखेआ जे पिंशनी होए दे लोकें ते वरिष्ठ नागरिकें दी सौख लेई शुरू कीती गेदी डिजिटल जीवन प्रमाण पत्र बवस्था नै अपने त्रीये गेड च रिकार्ड 1 करोड़ दा आंकड़ा पार करी लैता ऐ। उनें आखेआ जे एहू अभियान प्रधानमंत्री नरेंद्र मोदी हुंदे नजरिये दे मताबक वरिष्ठ नागरिकें दा जीवन असान बनाग। प्रधानमंत्री होरें आकाशवाणी दे मन की बात कार्यक्रम दी हाल दी कड़ी च वरिष्ठ नागरिकें गी सुविधा ते सरलता उपलब्ध कराने दी गल्ल आखी ही। डिजिटल लाइफ सर्टिफिकेट अभियान दा त्रीया गेड इस म्हीने दी पैहली तरीक थमां देश दे 800 शैहरें ते कस्बें च चलाया जा'रदा ऐ। एह्दे तैहत 25 नवंबर तोड़ी 1900 शां मते शिविर लाए जाई चुके दे न।

<><><><><><>

Met JK Weather

जम्मू-कश्मीर च इस म्हीने दे अखीर तोड़ी 3 दिनें तगर बरखें ते बर्फू दी पेशनगोई कीती गेई ऐ। आकाशवाणी जम्मू संवाददाता दी रिपोर्ट मताबक मौसम विभाग नै 29 नवंबर तोड़ी आम तौरा पर मौसम खुशक रौहने ते 30 नवंबर थमां हल्की बरखें ते हल्की बर्फबारी दी बी पेशगोई कीती गेई ऐ। 1 ते 2 दिसंबर दौरान उच्चियें धारें पर कुते-कुते हल्की बरखा ते हल्की बर्फबारी दी पेशगाई कीती गेई ऐ। औह्दे बाद 6 दिसंबर तोड़ी मौसम खुशक रौहग। तोआई कश्मीर घाटी च सीत बदी गेआ ऐ ते पहलगाम ते शोपियं अज्ज सब्बनें शा ठंडी थाह्हां रेइयां। श्रीनगर च तापमान 1 अशारिया 6 डिग्री सेल्सियस रेआ।

<><><><><><>

Search Operation Poonch

सुरक्षाबलें अज्ज पुंछ जिले च कब्जा रेखा दे नेडे संदिग्ध नक्लो-हरकत दिक्खने दिएं रिपोर्टें परैन्त इलाके च घेराबंदी ते तपाशी अभियान चलाया। आकाशवाणी दे जम्मू संवाददाता दी रिपोर्ट मूजब, राश्ट्रीय राईफल्स ते जम्मू-कश्मीर पुलस दे जवानें रलियै मॅण्डर सैक्टर च बेहरी रक्ख आहले जंगलें ते एह्दे कन्नै लगदे इलाकें च किश संदिग्ध नक्लो-हरकत बारै जानकारी थ्होने परैन्त उत्थे घेराबंदी अभियान चलाया। इसै किस्मै दा अभियान मनकोट इलाके च बी चलाया। ऊआं, अजें तोहडी आतंकवादिएं दा कोई सुराग ह्थ नेई लग्गे दा ऐ। इस बारै होर ब्यौरे गी बलगेया जा करदा ऐ।

<><><><><><>

LS-PMGKAY

सरकार नै अज्ज लोकसभा गी सूचित कीता ऐ जे प्रधानमंत्री गरीब कल्याण अन्न योजना राएं देश च 80 करोड शा मते लोकें गी लाह् थ्होआ ऐ। सदन च 1 लिखित परते च उपभोक्ता मामले, खाद्य ते सार्वजनिक बंड राज्यमंत्री निमूबेन बम्बनिया होरें दस्सेआ जे अगले 5 बरें लेई योजना गी जारी रक्खने लेई कोई सर्वेक्षण नेई कीता गेआ ऐ। उनें आखेआ जे हालांकि गरीब लाभार्थिएं दे माली बोझ गी घट्ट करने लेई मुफ्त अन्न-दाने दी बण्ड दी मियाद जनवरी 2024 शां अग्गे 5 बरे लेई बदाई दिती गेई ऐ।

<><><><><><>

LS-Waqf

केंद्री अल्पसंख्यक मामले दे मंत्री किरिन रिजिजू होरें आखेआ जे देश च करीब 59 ज्हार वक्फ संपत्तियें पर कब्जा ऐ। अज्ज लोकसभा च एह् जानकारी दिंदे होई उनें दस्सेआ जे अधिनियम दी धाराएं मताबक राज्य वक्फ बोर्ड दे मुख्व कार्जकारी अधिकारी गी वक्फ संपत्तियें पर अनधिकृत कब्जें ते कब्जें खलाफ कनूनी कार्रवाई करने दा हुक्म ऐ।

<><><><><><>

LS-Vaishnav

सूचना ते प्रसारण मंत्री अश्विनी वैश्वणव होरें आखेआ जे सोशल मीडिया उप्पर अश्लील सामग्री पर रोक लाने लेई मजूदा कनूनें गी होर मते सख्त बनाने दी जरूरत ऐ। लोकसभा च इक पूरक सुआलें दा परता दिंदे होई वैश्वणव होरें आखेआ जे सोशल मीडिया प्रेस दी स्वतंत्रता दा इक बड्डा माध्यम ऐ। मगरा सोशल मीडिया च संपादकीय जांच पडताल दी कमी करी अश्लील सामग्री दा प्रसारण बी हुंदा ऐ। ओ.टी.टी मंचें दी सामग्री दे बारे च वैश्वणव होरें आखेआ जे स्हाडे देशै दी संस्कृति ते नेह सोशल मीडिया जित्थुआं आया ऐ, उनें देशें दी संस्कृति च मता फर्क ऐ। उनें आखेआ जे संसद दी सरबन्धित स्थाई समिति गी इस मुद्दे पर विचार करना लोडचदा ऐ ते सख्त कनून बनाने लोडचदे। आचार संहिता तैहत प्रशासकें गी नेह कोई सामग्री दे प्रसारण दी इजाजत नेई ऐ जेडा जे कनून नै पाबंदी लाई ऐ। ओ.टी.टी मंचें लेई एह् बी प्रावधान ऐ जे ओह् ऐसी सामग्री दे प्रसारण च ध्यान रक्खडन जेडे जे बच्चें दे दिक्खने लेई स्हेई नेई ऐ।

<><><><><><>